



ТОШКЕНТ ОҚШОМИ

2009 йил 25 СЕНТЯБРЬ, ЖУМА

Газета 1966 йил 1 июлдан чиқа бошлаган

ШАҲАР ИЖТИМОЙ-СИЁСІЙ КУНДАЛИК ГАЗЕТАСИ

№ 190 (11.501)

Баҳоси эркин нарҳда

XXI сadosi
аср
БАРЧА МАНБАЛАРДАН
ОЛИНГАН СЎНГГИ ХАБАРЛАР

МАМЛАКАТИМИЗДА

● Ўзбекистон Республикаси давлат мулкни бошқариш давлат қўмитасида корхоналарда сифатни бошқариш тизимини жорий этишда бошқарув органларининг ўрнига бағишланган амалий семинар бўлиб ўтди.

● Нукус шаҳрида Ахборот коммуникация технологиялари ҳафталиги доирасида «ICTExpo—2009» кўргазмаси давом этмоқда. Унда Қорақалпоғистон Республикаси ва Хоразм вилоятидаги ахборот-коммуникация соҳасида фаолият кўрсатаётган корхона ва ташкилотлар ўз маҳсулотлари ҳамда хизмат турларини намойиш этмоқда.

● «Камолот» Ёшлар ижтимоий ҳаракати Марказий Кенгашида Ўзбекистон экологик ҳаракати, «Камолот» ЁИҲ ва Фуқаролик жамиятини ўрганиш институти ҳамкорлигида «Марказий Осиёдаги экологик вазият ва барқарор ривожланиш масалалари» мавзусида халқроқ давра суҳбати бўлиб ўтди.

● Республика Қишлоқ ва сув хўжалиги вазирлиги тасарруфидаги Ўзбекистон мойли ва толали ўсимликлар илмий-текшириш станцияси олимлари томонидан канопнинг янги — «Ўзбекистон — 2225» нави яратилди.

● Наманган шаҳрида автомобиль чироклари ишлаб чиқаришга ахборот коммуникация «UzChasys» Ўзбекистон-Корея қўшма корхонаси иш бошлади. «Ўзавтосаноат» акциядорлик компанияси ва Корея Республикасининг «UzChasys» Co.Ltd компанияси ҳамкорлигида ташкил этилган ушбу корхона вужудга келишида тўрт миллиард сўм маблағ сарфланди.

● Термиз туманидаги Лимонзор қишлоғида 615 ўқувчи ўрнига мўлжалланган туризм ва меҳмонхона хўжалиги касб-хунар коллежи фойдаланишга топширилди.

● Ўзбекистон Фанлар академиясининг Биоорганик кимё институти олимлари томонидан вирусли гепатит хасталигига қарши ишлатиладиган янги тиббий восита яратилди. «Рагосин» деб номланган ушбу восита муваффақиятли синовдан ўтди.

● Пойтахтимиздаги Лаъл Баҳодир Шастири номидаги Ҳинд маданияти марказида «Ҳинд-ўзбек тарихий ва маданий алоқалари: Самарқанд, Бухоро ва Кашмир мисолида» мавзусида учрашув бўлиб ўтди.

● Наманган шаҳрида «Тадбиркор аёллар маҳсулотлари—2009» ярмаркаси ўтказилди. Унда соҳада катта тажриба тўплаган, ишлаб чиқарган маҳсулотларига ҳўрж истеъмолчилари ҳам харидор бўлаётган 60 нафардан зиёд тадбиркор аёл иштирок этди.

ЖАҲОНДА

● Саудия Арабистонида илк бор аёл ва эркеклар бирга тахсил олувчи университет ўз фаолиятини бошлади. Энг сўнги русумдаги технологиялар билан жиҳозланган Қирол Абдулла номидаги мазкур Фан ва технологиялар университетига 800 нафар хоржилик талаба ва етмиш нафар профессор қабул қилинди.

● Гондураснинг қувғиндаги президенти Мануэль Селлая памаклатга пинҳона қайтиб, Тегусигальпадаги Бразилия элчихонасига яширилган. У элчихонага йиғилган тарафдорларини ўзини бошқарувдан четлаштирган Роберто Мичелеттидан ҳукуматни тортиб олишга чақирди. Бунга жавобан ҳозирда президентлик вазифасини вақтинча бажараётган Мичелетти комендантлик тартибининг жорий этди.

● Таиландда ОИТС хасталигига қарши яратилган янги вакцина синовдан ўтказилди. Мазкур синов жараёнига мамлакатдаги хасталик энг кўп қузатилган минтақасида яшовчи 18-30 ёш атрофидаги 16 минг киши жалб этилган. Янги вакцина касаллик хавфини 31 фоизга қисқартириши аниқланган.

● «РИА Новости» ахборот агентлигининг хабарида айтилишича Россиянинг Воронеж шаҳридаги пиротехника воситалари сақланувчи омборда портлаш содир бўлди. Фалокат натижасида омбор биноси жиддий зарар кўриб, 42 киши ҳалок бўлган.

● Жорий йилнинг август ойида Буюк Британия банклари томонидан берилган ипотека кредитлари микдори ўсиши қузатилгани ҳақида «Евроньос» телеканали хабар беради. Ушбу муддатда миҳозларга 38 мингта кредит ажратилган бўлиб, бу ўтган йилнинг шу даврига нисбатан 81 фоизга ортиқдир.

● «АФР» ахборот агентлигининг маълумотларига кўра, кучли ёмғир натижасида Ҳиндистоннинг Корба шаҳридаги иссиқлик электр станциясида бахтсиз ҳодиса юз берган. Ҳали қурилиши тугалланмаган миноранинг ағдарилиб кетиши туфайли 20 га яқин киши ҳаётдан қўз юмган. Вайроналар остида яна ўнлаб одамлар қолиб кетганлиги тахмин қилинмоқда.

● Германиянинг Бавария шаҳрида яшовчи фуқарога омад кулиб боқди. У лотереядан 31,7 миллион евро ютиб олди. Давлатга тегишли бўлган «Тото-Лотто» номли мазкур лотереянинг ютуқ жамғармаси 87 миллион еврога тенг эди.



Пойтахтимизда фаолият юритаётган корхоналар орасида «Агрегат заводи» очиқ акциядорлик жамияти жамоаси ўз ўрнини топган бўлиб, унинг цехларида илғор, самарали технологиялар асосида ишлаб чиқарилаётган маҳсулотлар қишлоқ хўжалигида қўлланилмоқда.

ПОЙТАХТНИНГ БИР КУНИ



Иқтисодиёт

МАҲСУЛОТ ТУРЛАРИ КЎПАЙДИ

Ҳозирда мазкур жамият сафларида 500 нафарга яқин малакали ўз касбига алоҳида меҳр қўйган ишчи-хизматчилар меҳнат қилишмоқда. Узоқ йиллар давомида бу ерда ишлаб чиқарилаётган агрегат, саялка, шестерня насослари, мотор-редукторлар, машина ҳамда тракторлар учун қўллаб турдаги эҳтиёт қисмлар сифати ва рақобатбардорлиги боис нафақат ички, балки ташқи бозорда ҳам ўз ўрнини топган. Бозор иқтисодиёти шароити талабларидан келиб чиққан ҳолда ушбу завод реконструкция қилиниб, замон талаблари даражасидаги компьютерлаштирилган бошқарувга эга бўлган машҳур компанияларнинг технологик линия, дастгоҳ ва ускуналари билан жиҳозланди, ишчиларга уларни бошқаришни ўргатишда етакчи мутахассислар кўмагидан фойдаланилди. Мустақиллигимиз шарофати билан ушбу жамоа аъзолари эндиликда четдан келтириладиган, импорт ўрнини босувчи маҳсулотларни тайёрлашмоқда. Асосан, қишлоқ хўжалиги маҳсулотларини экиш, ерни ўғитлаш,

ишлов бериш, йиғиб олиш, ер ва ундан олиннадиган ҳосил унумдорлигини ошириш мақсадларига кўмаклашувчи, деҳқонларнинг меҳнатини энгиллаштирувчи машина ва техникалардан — «ОВХ-600» русумидаги саялка, «НШ-32», «НШ-50», «НШ-100» русумли насослар, агрегатлар харидорлиги билан ажралаб туради. Шунингдек, бу ерда ички бозорни ўрганиш асосида қўллаб турдаги халқ истеъмоли моллари ҳам тайёрлаб келинмоқда.

Шу ўринда, жорий йилда корхонада юзага келган ҳолат — пойтахтда узоқ йиллар фаолият юритган «Ўзбекиқишлоқмаш» заводи тугатилган, жамиятда мазкур завод ишлаб чиқарган маҳсулотлар: «КИР-15» русумли ўт ўриш машиналари, «СЧ-4» пахта экиш саялкалари, «РМУ» русумидаги минерал ўғит сепиш машиналари ишлаб чиқариш йўлга қўйилди. Корхона маҳсулотлари «Ўзбекистонда ишлаб чиқарилган» тамғаси билан Ҳамдўстлик давлатларига экспорт қилинмоқда. Жаҳонда юзага келган молиявий инқирозга қарамай ин-

қирозга қарши чоралар дастурига кўра маълум йўналишлар — ишлаб чиқаришда хом ашё ва материаллар харажатлари меъёрини камайтириш ва энергия ресурсларидан оқилона фойдаланиш ҳисобига маҳсулот таннархини камайтиришга эришилди. Маҳаллийлаштириш дастурига иштирок этаётган жамоа ахли режавий ишларни амалга оширмоқда.

Меҳнат унумдорлиги ва маҳсулот сифатини таъминлашда ишчи-хизматчиларга яратилган меҳнат қилиш ҳамда дам олиш шароитлари муҳим рол ўйнамоқда. Уларнинг ижтимоий ҳимоясига катта эътибор қаратилган.

Муҳаббат ХАБИБУЛЛАЕВА


СУРАТЛАРДА: «Агрегат заводи» очиқ акциядорлик жамияти жамоасининг тажрибали, етук мутахассислари сифатида маҳсулот тайёрлаш йўлида астойдил меҳнат қилишмоқда.

Ҳақимжон Солиҳов олган суратлар.

«Tashkent open—2009»

БАҲСЛАР ҚИЗГИН ПАЛЛАДА

Республика Олимпия заҳиралари теннис мактаби кортларида аёллар ўртасида бўлиб ўтаётган халқаро «Tashkent open—2009» мусобақаси қизгин паллага кирди.



Кучли спортчилар қаторида умидли ёш теннисчи қизлар ҳам турнир соврини учун куч синашиб, имкониятларини кенгайтиришга астойдил киришганини қузатиш мумкин. Бутунжаҳон аёллар теннис уюшмаси мақоми остида ўтказиб келинаётган мазкур Тошкент очиқ чемпионати теннисчиларга камида йигирма поғона юқори кўтарилишига имконият беради. Таъкидлаб ўтамиз, бу энг камида. Демак, финал ва шохсу-па қанчалик яқин бўлса, спортчининг рейтинг мақоми ҳам шунчалик ортаваради. Бундан ташқари, алоҳида вазиятлардаги ўйини учун ҳам спортчи икки ва ундан кўпроқ баробар очко тўплаши мумкин. Масалан, агарда кучли сифатида сараланган ўйинчини доғда қолдира олса, рейтинг даражаси кескин юқорилашига туртки бўлади. Албатта, турнирга тўрт-беш босқичда сараланиб йўлланмани қўлга киритган теннисчи кортда кучли рақибга қарши келиб, уни мағлуб этса, имкониятлари бундан-да ошади. Хуллас, ҳамма нарса беллашув жараёнида маълум бўлади...

(Давоми 4-бетда).

ҚИСҚА САТРАРДА

Тошкент шаҳар ҳокимлигининг Ахборот хизмати ва ўз муҳбирларининг хабарларидан.

✓ **КЕЧА** Шайхонтоҳур туманидаги Ибн Сино гузарига туман ҳокимлиги, туман хотин-қизлар қўмитаси ҳамкорлигида 1 октябрь — Устоз ва мураббийлар кўнига бағишлаб уюштирилган катта байрам тадбирида тумандаги фахрий ўқитувчилар ва мураббийлар иштирок этишди.

✓ **БУГУН** Яққасарой туманида «Диний экстремизм ва терроризмнинг бугунги жамият ривожига хавфи» мавзусида ёшлар иштирокида ўтказилган тадбир Республика Маънавият тарғибот марказининг Яққасарой туман бўлими ташаббуси билан уюштирилди.

✓ **БУГУН** Ҳамза туман хотин-қизлар қўмитаси ташаббуси билан «Аёллар минбари» мавзусида уюштирилган маънавий-маърифий тадбирда туманнинг фаол аёллари иштирок этишди.

✓ **МИРОБОД** туман маданият ва спорт ишлари бўлими ҳамда Тошкент шаҳар Корея миллий маданият маркази ҳамкорлигида Фахур Гулом номли маданият уйида бадиий хаваскорлик жамоалари, тўғарақлар, курслар раҳбарлари, қатнашчилари иштирокида уюштирилган маънавий-маърифий тадбир «Барчани рақсга таклиф этамиз» деб номланди.

З.УСМОНОВА,
ЎЗА муҳбири

